



# ლანჩხუთის მუნიციპალიტეტის საკრებულო



განკარგულება:გ-31.31210574

თარიღი:26/02/2021

## ლანჩხუთის მუნიციპალიტეტის საკრებულოს

### განკარგულება №8

2021 წლის 26 თებერვალი

#### ქ. ლანჩხუთი

### ლანჩხუთის მუნიციპალიტეტის სუფსისა და ღრმაღელის ადმინისტრაციულ ერთეულებში, გრიგოლეთისა და ყვავილნარის სანაპირო ზოლის განაშენიანების გეგმის კონცეფციის დამტკიცების შესახებ

გრიგოლეთი მდებარეობს ლანჩხუთის მუნიციპალიტეტის სუფსის ადმინისტრაციულ ერთეულში, კოლხეთის დაბლობის დასავლეთ ნაწილში, შავი ზღვის პირას, ზღვის დონიდან საშუალოდ 3 მ-ზე. მანძილი თბილისიდან – 315 კმ-ია, ლანჩხუთიდან 25 კმ., სუფსიდან 7 კმ, ურეკიდან (რკინიგზის უახლოესი სადგური) 6 კმ. მასზე გადის საერთაშორისო მნიშვნელობის საავტომობილო გზა სამტრედია-ლანჩხუთი-გრიგოლეთი ს12. სოფელში დგას გრიგოლ ღვთისმეტყველის სახელობის ეკლესია. ტერიტორიაზე მდებარეობს ტბა გრიგოლეთი. სოფელ გრიგოლეთის მოსახლეობის რიცხოვნობა 2014 წლის საყოველთაო აღწერით 286-ია. სანაპირო ზოლის მცირე ნაწილი მდინარე სუფსის მარცხენა სანაპიროს მიმდებარედ არის ღრმაღელის ადმინისტრაციული ერთეულის სოფელ წყალწმინდის ტერიტორია (ე.წ. ყვავილნარი), რომელიც ასევე წარმოადგენს სამკურნალო თვისებების მქონე პლაჟს და გრიგოლეთთან ერთად ქმნის ერთიან სანაპირო ზოლს.

გრიგოლეთსა და ყვავილნარს არ გააჩნიათ კანონმდებლობის შესაბამისად შემუშავებული და დამტკიცებული ქალაქმშენებლობითი დაგეგმვის დოკუმენტაცია, ამდენად, მათი განვითარება ხდება არაგეგმიურად და უსისტემოდ, რაც ზღუდავს მნიშვნელოვანი ბუნებრივი რესურსების ეფექტიან გამოყენებას, აფერხებს დამსვენებლებისა და ტურისტული ნაკადის ზრდადობას.

აღნიშნულიდან გამომდინარე, სუფსისა და ღრმაღელის ადმინისტრაციულ ერთეულებში, გრიგოლეთისა და ყვავილნარის სანაპირო ზოლის განაშენიანების გეგმის შემუშავების მიზნით გამოცხადდა კონკურსი, რომელში გამარჯვებულმა ა(ა)იპ „საქართველოს სივრცითი განვითარების მართვის ინსტიტუტმა“ მოამზადა გრიგოლეთისა და ყვავილნარის სანაპირო ზოლის განაშენიანების გეგმის კონცეფცია. აგრეთვე გარემოს დაცვისა და სოფლის მეურნეობის სამინისტროს მიერ მომზადებულია გრიგოლეთისა და ყვავილნარის განაშენიანების გეგმის

სტრატეგიული გარემოსდაცვითი შეფასების სკოპინგის დასკვნა.

საქართველოს ორგანული კანონის „ადგილობრივი თვითმმართველობის კოდექსი“ 61-ე მუხლის მე-2 ნაწილის, საქართველოს კანონის „საქართველოს სივრცის დაგეგმარების, არქიტექტურული და სამშენებლო საქმიანობის კოდექსი“, „სივრცის დაგეგმარებისა და ქალაქმშენებლობითი გეგმების შემუშავების წესის შესახებ“ საქართველოს მთავრობის 2019 წლის 3 ივნისის N260 დადგენილების მე-19 მუხლის შესაბამისად:

**მუხლი 1.** დამტკიცდეს ლანჩხუთის მუნიციპალიტეტის სუფსისა და ღრმაღელის ადმინისტრაციულ ერთეულებში გრიგოლეთისა და ყვავილნარის სანაპირო ზოლის განაშენიანების გეგმის კონცეფცია დანართის შესაბამისად.

**მუხლი 2.** განკარგულება შეიძლება გასაჩივრდეს ოზურგეთის რაიონულ სასამართლოში, მისამართზე ქ. ოზურგეთი, ი. სიორიძის ქ. №14 მისი ამოქმედებიდან ერთი თვის ვადაში საქართველოს კანონის „საქართველოს ადმინისტრაციული საპროცესო კოდექსი“ მე-8 თავის 22-ე მუხლის მე-3 პუნქტის შესაბამისად.

**მუხლი 3.** განკარგულება ძალაშია გამოქვეყნებისთანავე.

ბესიკ ტაბიძე

ლანჩხუთის მუნიციპალიტეტის საკრებულო-  
საკრებულოს თავმჯდომარე

გამოყენებულია კვალიფიციური  
ელექტრონული ხელმოწერა/  
ელექტრონული შტამპი



